

27 MAR 2001

Mahathir-PAS

KEENGGANAN PAS TARIK BALIK AMANAT HADI MENYELEWENG DARIPADA AJARAN ISLAM

KUALA LUMPUR, 27 Mac (Bernama) -- Datuk Seri Dr Mahathir Mohamad berkata keengganan PAS untuk menarik balik Amanat Haji Hadi yang dikatakan bercanggah di sisi Islam menunjukkan bahawa parti itu sebenarnya telah menyeleweng daripada ajaran Islam yang sebenar.

"Mereka sebenarnya memeralatkan Islam untuk mengeliru dan menggagalkan pegangan orang Islam kepada ajaran Islam yang sebenar," kata Perdana Menteri semasa menjawab soalan tambahan Datuk Haji Mohamad Haji Aziz (BN-Sri Gading) pada persidangan Dewan Rakyat di sini hari ini.

Mohamad ingin tahu apakah tindakan seterusnya yang akan diambil terhadap taktik kotor parti politik pembangkang dan apakah yang boleh dimainkan rakyat untuk mengenenpikan segala putar-belit PAS dalam perpaduan Melayu dan negara.

Dr Mahathir berkata Umno akan memberi penerangan kepada rakyat mengenai taktik PAS itu.

Perdana Menteri berkata kerajaan pimpinan Umno percaya kepada sistem demokrasi dan pemerintahan yang berlandaskan undang-undang.

Katanya tindakan akan diambil terhadap mana-mana pihak yang menyalahi undang-undang tetapi kerajaan tidak akan mengambil tindakan secara sewenang-wenangnya.

"Kita akan memberi peluang untuk membetulkan diri mereka apabila mereka melakukan kesalahan terutama kesalahan seperti menuduh orang Umno kafir dan membuat kenyataan serta amanat yang tidak hendak ditarik balik kerana kononnya ia pendapat seorang ulama," katanya.

Presiden PAS Datuk Fadzil Noor hari ini dilaporkan sebagai berkata bahawa parti itu tidak akan menarik balik Amanat Haji Hadi yang dikatakan menjadi punca kejadian mengkafirkan orang Umno oleh kalangan penyokong PAS.

Semasa menjawab soalan tambahan Nasharuddin Mat Isa (PAS-Yan) yang ingin tahu mengapa Umno kini beria-ia menumpukan kepada perpaduan Melayu dan melupakan masyarakat majmuk yang sebelum ini dijadikan alasan undang-undang Islam tidak boleh dilaksanakan, Dr Mahathir berkata kerajaan tidak pernah menyatakan bahawa undang-undang Islam tidak boleh dilaksanakan di Malaysia.

Katanya apa yang dikatakan ialah pelaksanaan undang-undang Islam adalah mengikut kemampuan satu-satu negara.

"Kalau kita duduk dalam sebuah negara yang majoritinya terdiri daripada bukan Islam, percubaan untuk melaksanakan undang-undang Islam hanya akan menimbulkan masalah. Islam tidak menyuruh kita berbuat sesuatu yang timbulkan masalah," katanya.

Katanya undang-undang Islam telah banyak dilaksanakan di negara ini.

"Tetapi PAS sengaja membangkitkan soal hudud kerana hendak timbul masalah kepada kerajaan dan menjadikan ia sebagai bahan meraih sokongan," katanya

Perdana Menteri berkata PAS yang sekarang menjadi kerajaan negeri di Kelantan dan Terengganu, seharusnya boleh mencuba bagaimana hendak melaksanakan semua undang-undang Islam.

Mengenai dakwaan bahawa sokongan orang Melayu terhadap Umno telah merosot, Dr Mahathir berkata ia sebenarnya tidak merosot kerana Umno pada pilihan raya umum lepas masih berupaya memenangi sebanyak 72 kerusi manakala PAS hanya 27 kerusi.

"Kita (Umno) menang 72 kerusi, PAS menang 27 kerusi, lebih sikit dari dulu tetapi hanya kerana mata lebam bukan kerana apa-apa lain. Bukan kerana

kebolehan tertentu PAS untuk mendirikan kerajaan yang boleh menyumbang kepada pembangunan negara.

"Pi dok tayang mata lembam itu dan kata saya yang pukul si polan si polan, kalau ini cara satu parti yang ingin menjadi pemerintah, saya kkuatirlah apa akan jadi kepada negara kita," katanya.

-- BERNAMA

HS NMO